



CASSIE BERNALL

DATA no FATIN MORIS: 6 novembru 1981 , iha Colorado, U.S.A.
AMAN: naran Brad
INAN: naran Misty
ALIN MANE: naran Chris

LABARIK

Cassie sai boot iha família ida ne'ebé hadomi liu nia.
Aman no inan mak sarani di'ak ne'ebé akompaña sira nia oan na'in rua ho domin.
Ninia alin Chris hadomi liu Cassie no hateke ba nia nu'udar modelu ida

ADOLEXENTE

Bainhira Cassie nia tinan 15 nia hahú hadook an husi família hodi hakbesik grupu sira ne'ebé ladún di'ak; nia tuir sira halo buat aat.
Loron ida nia inan hetan surat ruma, ne'ebé kolega ida hakerek ba Cassie, nakonu ho liafuan tolok nian, hahí ba demóniu, konvida nia atu koko droga no oho aman-inan sira no professor sira.
Nia aman no inan koko atu hadook Cassie husi belun sira ne'e, bandu ba nia atu sai hamutuk ho sira; Cassie nia reasaun maka'as tebes: nia ameasa atu oho an, hakanek an, baixa tiha iha ospital presiza kontrola nia tanba nia koko atu halai fali ba kolega sira ne'e. nia moris ona iha nakukun laran no la iha kbiit atu sai husi situasaun ida ne'e.
Atu resolve problema ida ne'e, aman-inan haruka nia ba eskola katolika ida, iha ne'ebé Cassie bele hasoru kolega di'ak sira no la bele hetan fali sira ne'ebé aat. Founfoun Cassie la simu situasaun foun ne'e, maibé neineik, nia resisténsia monu ona no nia hahú buka belun sira iha eskola laran.

BELUN FOUN IDA

Entre kolega sira ne'ebé tuir eskola ida ne'e, Cassie hahú hasoru Jamie, no ko'alia beibeik iha uma laran kona-ba kolega ida ne'e, hodi husu ba nia inan se nia bele ba estuda hamutuk iha uma. Nia inan hakerek: *"Ha'u kontente liu bainhira Cassie ko'alia kona-ba Jamie, tanba ha'u hein katak menina ida ne'e mak sarani di'ak ida ne'ebé bele iha influénsia positiva no tulun ha'u-nia oan atu hetan fali moris hakmatek. Maibé bainhira Jamie ba ami-nia uma ba dala uluk, ha'u hakfodak: menina ne'e pinta nia fu'uk kinur no mean, hatais la jetu no tara korente besik nian iha knotak. Maski nune'e, nia matan nabilan no hatudu ksolok ne'ebé oin seluk; ninia laran luak mós halo ha'u hanoin katak maski nia hatudu an hanesan rebelde ida, maibé, iha laran, nia mak ema di'ak ida."*

MOMENTU MUDANSA NIAN

Iha fulan marsu 1997, Cassie fó hatene ba aman-inan katak Jamie konvida nia atu ba tuir retiru espirituál ida. Sira hanoin kle'ur atu fó lisensa ba nia, tanba sira ta'uk katak nia bele lohi sira, maibé, tanba haree katak Cassie nia hahalok mós muda uitoan, sira deside atu fó konfiansa ba sira-nia oan. Iha foin-sa'e 300 ne'ebé retiru ida ne'e, maibé Cassie ladún liga sira. Jamie laiha ona esperansa atu bele tulun Cassie, maibé, loron ikus nian, teki-tekil nia hahú tanis hodi hanoin buat hotu ne'ebé nia halo. Durante Missa, foin-sa'e sira lori ba altar sira-nia buat karan, Cassie la iha buat ida, maibé nia hahú fo sa'e nia sala hotu; foin-sa'e barak la komprende buat ne'ebé nia dehan, maibé sira rona ho hakmatek Cassie nia liafuan sira. Depois de liturjia, Cassie, Jamie no foin-sa'e na'in tolu, hein iha liur hodi hateke ba fitun sira: sira hotu nonok, hodi kontempla Maromak nia kmanek no hanoin ba sira-nia frakeza .

MORIS FOUN

Husi momentu ida ne'ebá, Cassie haka'as an atu troka ninia moris, nia hateten ba Jamie katak nia liu husi Inferno ida no nia lakohi katak nia alin halo experiénsia hanesan.
Iha fulan setembru 1997, nia troka eskola no hahú ba "High School Columbine" tanba nia dehan ba nia inan: *"Iha eskola katolika ida ne'ebá, la presiza ha'u-nia sasin; se ha'u ba eskola publika, ha'u bele hatudu ba ema barak liu ha'u-nia fiar."*

Akontesimentu ne'ebé provoka ninia mate

Loron 20 abril 1999, foin-sa'e na'in rua tama iha sira-nia eskola (High School Columbine) ho pistola no hahú tiru ba kolega no profesór sira. Sira oho ema na'in 13, entre sira mós iha Cassie.

Nia foin tama biblioteca atu buka buat ruma ba ninia TPC, bainhira profesór sira tama iha sala laran hodi hakilar: "Sai husi iha ne'e, iha foin-sa'e na'in rua ho pistola". Foin-sa'e hotu hamnasa tanba sira hanoin katak profesór ida ne'e halimar, maibé besik odamatan teki-tekil rona tiru ruma. Profesór hakilar fali, maibé sira ne'ebé koko atu sa'e monu kedas ho kanek. Foin-sa'e sira buka atu subar iha mesa okos, bainhira sira na'in rua tama: sira hamnasa, hanesan sei halimar daudaun, sira tiru ba ema no hamnasa fali hodi dehan: "Kleur ona ami hein atu halo buat ruma nune'e!!" Cassie nia belun fó sasin lahanasan kona-ba ninia hahalok, balun dehan katak nia subar iha mesa okos hodi tau liman hanesan ema ne'ebé reza, balun dehan katak nia tur nafatin, maibé reza. Sira na'in rua hakbesik nia no ida husu: "Ó fiar Maromak?" Foin-sa'e hotu ne'ebé subar besik Cassie, rona pergunta ida ne'e no sira hotu konkorda atu dehan katak foin-sa'e ida ne'e

husu tanba Cassie sei reza daudaun bainhira sira hakbesik nia. Cassie hein utoan, hafoin ho lian forte hatán: "HA'U FIAR!", sira simu hodi dehan: "Tansá?", maibé sira la hein resposta no sira tiru kedas ba nia.

Husi Cassie Bernall nia diariu ka surat sira

-  Molok hasoru Maromak ha'u liu husi terus boot... ha'u la hatene oinsá ha'u bele halo nune'e, maibé ha'u espresa ha'u-nia laran triste no hirus hodi hakanek ha'u-nia an: ha'u uza haramé atu hakanek ha'u-nia liman, ha'u baku ha'u-nia ulun iha didin... maibé ha'u ta'uk atu oho an! Iha momentu ida ne'ebá ha'u sente mesak... nune'e ha'u fó ha'u-nia kلامar ba Satanas.
-  Ha'u agradece Na'i ba buat hotu ne'ebé Nia halo ba ha'u no ba ema seluk. Maski buat ruma la'o la loos, ha'u sente katak Nia la'o hamutuk ho ha'u, nune'e situasaun sai di'ak utoan! Ha'u husu ba ha'u-nia an "Saida mak Maromak hakarak husi ha'u?". Nia husu ba ema ruma atu sai misionariu, ba ema seluk atu haklaken Nia...Maromak prepara sa loos ba ha'u? Ha'u-nia talentu sa de'it? Oras ne'e ha'u moris tuir buat ne'ebé mosu, maibé loron ida ha'u sei hatene.
-  Ha'u sente katak ha'u tenke oferese buat hotu ba Maromak, maibé bainhira ha'u hanoin katak ha'u la'o ona tuir dalan loos, ha'u lakon fali kontrolu! Se ha'u bele manán ha'u-nia foti an, ha'u sei hetan damen no ha'u sei buras hamutuk ho Maromak. Ha'u presiza sai onestu ho ha'u-nia an no ho Maromak.
-  Ha'u hakarak husik Jezús moris iha ha'u-nia moris, tan ne'e ha'u tenke mate ba ha'u-nia an rasik no hakribiit moris iha egoizmu.
-  Bainhira Maromaki lakohi katak ha'u halo buat ruma, ha'u hatene didi'ak, no mós bainhira Nia hakarak buat ruma ne'ebé hadook ha'u husi ha'u-nia "moris di'ak". Ha'u sente katak ha'u tenke ba iha ne'ebé Nia hakarak. Ha'u haka'as an atu defende ha'u-nia fiar iha eskola... ha'u hakarak mate ba Maromak, ha'u hakarak mate ba ha'u-nia fiar. Ida ne'e mak buat ki'ik ida ne'ebé ha'u bele halo ba Kristu, ne'ebé mate atu soi ha'u".



ATU HATENE CASSIE BERNALL DI'AK LIU TAN

- ➔ Iha YouTube bele hetan buat ruma: liuliu filmajen barak ne'ebé tau hamutuk Cassie nia foto sira, no kolega sira seluk ne'ebé mate hamutuk ho nia. Hodi hakerek "flyleaf – Cassie" bele hetan versaun oioin kona-ba knananuk ne'ebé nia kolega sira hakerek tuir ninia mate; maibé mós se imi husu Cassie Bernall sei mosu pajina 7 resin kona-ba nia (inglés no portugués)
- ➔ Iha filme/dokumentu ida "Bowling for Columbine", iha ne'ebé rejista Michael Moore analiza problema kona-ba ema barak ne'ebé lori kilat. Durante filme hatudu mós gravasaun ne'ebé hasa'e husi eskola nia videokamera, bainhira foin-sa'e na'in rua ne'e tama iha eskola laran.

Ha'u gosta saida iha Cassie nia moris? Ha'u sei la liu karik husi sasin mate nian, maibé oinsá ha'u bele prepara ha'u-nia an hanesan Cassie halo? Nu'udar Timor oan, ha'u bele banati tuir nia iha aspetu ida ne'ebé?